

丁文誠公奏稿

丁文誠公奏稿

卷之十一目錄

擬在賈莊建壩普築長隄摺

同治十三年十一月二十日

籌議海防應辦事宜摺

同治十三年十一月二十日

請飭黑龍江等處精練馬隊片

同日

調張蔭桓文天駿片

同日

荷澤堵口兩壩進占摺

同治十三年十二月十四日

恭慰聖慈大孝摺

同治十三年十二月十九日

勘估運河籌款修理摺

同治十三年十二月十九日

河工現辦情形趕築南岸大隄摺

光緒元年正月二十日

金門收窄催料趕辦摺

光緒元年二月十九日

荷澤賈莊大工合龍摺

光緒元年三月初十日

壩工隄工截明用數摺

光緒元年四月十四日

大工用費節省請免造冊報銷片

月日

大工用款開單具陳摺

光緒元年六月初十日

隄工用款請 簡員查勘摺

光緒元年六月初十日

黑龍江練兵事宜摺

光緒元年八月初二日

密陳各國兵船來煙片

同日

保舉薛福成黎庶昌暨徐建寅創辦機器片

同日

擬在賈莊建壩普築長隄摺

同治十三年十一月二十日

奏爲勘明石莊戶決口萬難施工現擬在池下之賈莊建壩堵合卽於南北岸普築長隄並確覈工需以資趕辦恭摺馳陳仰祈

聖鑒事竊

臣

前將回任後趕緊籌辦石莊戶決口並親往

查勘緣由恭摺具奏茲於本月十六日在荷澤賈莊工次欽奉

硃批該部速議具奏欽此十七日承准軍機大臣字寄同治十三年十一月十四日欽奉

上諭戶部工部會議奏稱石莊戶決口關係東南兩省大局自應趕籌修築所需工款除上年存銀二十八萬兩外

擬撥各省地丁等銀七十萬兩以資應用等語現在經費支絀該部以有上年存款可以動用合之此次撥款幾及百萬當可興工舉辦惟據該撫所奏決口情形亟宜及時趕辦設因款項不繼致有停待貽誤匪輕著戶部仍照該撫原請一百五十萬兩之數卽行指撥有著之款趕緊撥解毋誤要需欽此仰見

聖主痼瘼在抱軫念要工莫名欽感臣於出省後由東昌濮州取道直隸之開州東明由司馬集乘船順流而下至石莊戶口門查看兩岸寬約二里有餘探量水深二丈餘當冬令水涸之際溜勢尙屬奔騰而北面舊河正身業已淤成平陸僅存小溝形二道計長二十餘里若欲從此堵

合必須大挑引河工費不知凡幾臣詳審再三無從著手
深歎今春坐失事機良爲惋惜嗣沿海復下行十餘里所
見溜勢雖盛河面較窄當卽登岸察看南爲荷澤之賈莊
北爲開州之藍口賈莊東五六里則大溜分爲兩股各寬
里餘愈東則水面愈寬無可施工藍口之西有向北小溜
一股約分大河二分水勢十餘里外歸入舊河臣連日往
復履勘細審形勢惟有在賈莊藍口作爲壩基卽借北入
舊河之微溜作爲導引冀省挑挖引河鉅費當經緝量口
門計寬二百六十丈兩崖水深七八九尺中間水深一丈
六七八尺分溜小河近南露灘處寬十餘丈水深七八尺
向北寬二十餘丈水深五六尺若從賈莊堵合正溜由藍

口分溜引歸舊河則由張家支門王老戶下注東南之漫水皆可斷流此兩溜水勢寬深之大概也正溜南岸涸出未久土性尙軟灘面間有積水取土須遠在五六里外北岸灘崖較高取土略近然亦不能深挖至兩岸土性多帶淤沙如盤做壩基必須深刨底槽鋪料追壓直至堅土始能立住腳根又北灘尙有串入舊河之小溝三道寬二三丈水深四五尺淤泥數段寬數十丈至百餘丈不等亟須分投堵塞填墊以通料路就辦工而論此等壩基土性實係十分棘手之工現在黃流皆係普漫之水久淤之灘本非正河高岸安能形勢得宜前此懸揣情形深恐溜勢分歧一片稀淤無可立壩之處今幸得此形勢安敢畏難

況此外別無可施工祇有就此定作壩基不過土料極爲
紆迴工程倍加慎重正壩邊埽格外加寬以期得力至北
去雖有河形究屬淺隘掣溜恐難甚暢應於靠西築堰攔
水多挑引溝俟壩工進占後水漸擡高再行開放以成吸
川之勢較之引河全恃挑挖非寬深不能過水者其工費
所省實多此又壩基引河難易之大概也臣於接篆後卽
飛飭附近各州縣採辦正雜料物並移知東河督臣調派
文武員弁力作廂兵及應用船隻器具現在壩基既定卽
經委員安設廠座催集正料趕辦雜料臣卽親駐工次嚴
飭大小各員曉夜催趲以期及早興工至壩工雖屬東省
承辦而南屬荷澤北屬開州隔省施工一切恐難呼應仍

當移咨直隸督臣酌派大名道府一員常川駐工彈壓照料並隨事會議以資聯絡惟立壩旣已辦有頭緒築隄卽應早定規模查黃水之所以頻年旁溢者固以未有一定河形亦因無隄收束故水勢散漫易於淤決是以隄束水以水攻沙之策在此時尤爲急圖臣前摺所陳必統上下游南北岸一律兼籌者實有不可稍緩之勢就東省而論則荷澤爲南岸之上游而鄆壽居其下濮州爲北岸之上游而范壽居其下若南岸一律築隄則曹濟各屬現在被淹之地均得免害而江南之地在東省下游者其受益更不待言北岸一律築隄則濮范涸出地畝均得保全而金隄之爲北面屏障者且亦不致喫重惟荷澤之上游又在

東明濮州之上游又在開州是直隸之必須一體築隄尤不可緩緣銅瓦廂下注之水經祥符蘭儀長垣滑縣各境尙少旁溢之患南岸至東明何店相近之岸劉以下始有串灘支流數道如本年石莊戶並未堵築夏秋漫水仍至東明城東北二三十里若東明無隄則荷澤之隄無益也北岸在開東分轄之茅茨莊以下計有串灘支流八九道迤下匯成支河二道下注濮范每年夏秋無不有水本年秋後支河出槽普漫直至金隄之南水面寬至數十里若開州無隄則濮州之隄無益也故直隸南岸宜自何店築隄以屬於荷澤而南岸始固北岸宜自茅茨莊築隄以屬於濮州而北岸始固惟東明之隄祇須就濱河二三里之

地斜向東北卽可與荷澤之隄相接若開州之隄則近南
近北其利害仍復懸殊蓋開州自海同鎮至清河頭舊曾
立堰現在無幾者係前數年黃流北近金隄之情形自溜
勢南徙現在北岸水邊距州城已五六十里卽串灘之支
河二道距城亦在三四十里之遙是涸出灘地已遠今日
之立隄似應循南支河之南涯跨壓串灘水溝則無順隄
河形可免衝刷之虞東境濮州之隄卽與此隄相接庶民
地多得保全之益若僅就北支河之北涯則濮州之隄亦
須北移未免多損民地儻仍就清河頭之舊基則濮州之
隄又須向北所保民地實屬無幾究之上游有隄較之無
隄終屬受益應請

敕下直隸督臣飭令大名道府督飭開州東明安籌速辦
臣亦當量爲津貼庶幾上下南北悉臻完固至工需一節
臣前摺約估銀四百五六十萬兩先請撥銀一百五十萬
兩聲明俟查明確數應否續撥再行奏請現查口門計不
足三百丈引河不須全挑綜計兩項約可省銀八十萬築
隄之費業經委員分往丈量俟查明道里確數再行酌定
高下丈尺擬飭令各州縣剴切諭導民夫幫同興築爲按
里津貼之計則較之土方例價約可省銀一百萬兩合計
約共省銀一百八十萬兩仍需銀二百七八十萬兩現蒙
天恩俯照原請撥銀一百五十萬兩已屬

逾格鴻慈何敢實請惟是工程過大核計所短尙鉅臣惟

有力杜浮冒事事核實以期撙節但恐十分節減而或不敷之處自當再行續懇

恩施至部撥一百五十萬兩之外實在不敷銀一百二十萬兩臣擬卽在本省藩運兩司及糧道各庫臨清東海兩關隨時通融挪湊以濟要工庶大壩長隄均得及時趕辦壩工固須桃汛前合龍隄工亦須麥熟前完竣以期土性堅實捍禦伏秋惟臣所深慮者固在此時辦理之難而尤在將來防守之險因石莊戶決口年餘舊河水緩沙停悉受淤墊河底增淤一尺卽河面擡水一尺將來河勢北注設夏秋適逢異漲河槽未卽刷深新隄倍形喫重此係切實情形不能不陳於

聖主之前至臣先未查勘情形以東南大局攸關力請舉
辦今卽事機萬難決不復稍涉遲回惟有殫竭血誠期於
稍挽全局至前辦侯林大工曾奏明在事人員工成准其
破格獎敘儻有心貽誤卽行從嚴懲辦此次工程倍難於
侯工而款項又復艱窘非破除河工舊習事無大小綜核
維謹督責維嚴難期有成臣決不敢稍存情面但賞罰爲
鼓舞之具擬請仍照前案如各該委員有分毫浮冒因循
致誤者立卽嚴參治罪如眞能竭力以致工程迅速堅固
亦當准予優獎庶足以資激勵而儆怠玩謹將地方堵口
及築隄各形勢繪圖貼說恭呈

御覽所有勘明石莊戶堵口擬在池下施工暨應築隄工

各緣由謹會同直隸督

臣

李鴻章兩江督

臣

李宗義東河

督

臣

喬松年署漕運督

臣

恩錫河南撫

臣

錢鼎銘恭摺附

驛四百里馳陳伏乞

皇上聖鑒訓示再以後河工奏報照例由驛馳遞合併陳

明謹

奏

籌議海防應辦事宜摺 同治十三年十一月二十日

奏爲遵

旨籌議海防應辦事宜恭摺密陳仰祈

聖鑒事竊 臣回任後接准前署撫 臣文彬密交同治十三

年九月二十七日欽奉

上諭總理各國事務衙門奏海防極宜切籌請飭詳議一摺該王大臣所陳練兵簡器造船籌餉用人持久各條均係緊要機宜著詳細籌議將逐條切實辦法限於一月覆奏此外別有要計亦卽一併奏陳欽此又交到接准總理各國事務衙門咨行同治十三年十月二十日該衙門議覆廣東巡撫具奏丁日昌預擬海洋水師章程六條一摺

所籌練兵築臺之法是否可行及將來如何設備應由沿海各大臣體察就地情形詳審推求方可見諸行事請敕下各大臣將軍督撫等彙入臣衙門前奏仍於一月內一併妥籌復奏於同治十三年十月十三日欽奉硃批依議欽此伏讀之下仰見我

皇上慎固海疆集思廣益之至意欽服莫名臣竊維海防應辦之事大要實不外練兵簡器造船三大端而籌饒爲兵器船三者之根本用人持久又爲兵器船三者之實用總理衙門王大臣思患預防請

飭詳議切實辦法極爲切要之圖惟各省海疆之形勢不同斯防守之機宜亦異臣忝任東疆海防是其專責謹將

各條切實辦法並參酌丁日昌所籌練兵築臺之法一併彙入妥籌詳議敬爲我

皇上陳之

臣

閱練兵一條查該王大臣等所議係水陸並

重丁日昌所籌以陸兵兼習水師用意同而練法則實有別蓋陸兵與水師惟紀律嚴明彼此無異至操練技藝陸兵無風濤不測之險一切槍礮刀矛坐作進退可以從容演習卽如丁日昌所云徒手上城憑篙躍濠各技稍爲便捷之夫一學而能以其暇豫故也水師則操練槍礮須出沒於驚風駭浪之中顛簸欹覆之際發必命中乃爲得力是則不待臨敵當操練時已有危險之勢非陸兵之所可擬故海防宜專練水師而切實練法雖貴駕駛得宜風濤

熟悉尤必練之使能入海施放鳥槍爲長技始也由淺而漸及深由暫而漸及久總期於入水數十丈經歷四五時爲定追練之既久身與水習入海不濡當臨敵之餘雖使敵礮覆舟猶能伏水應變至於教練槍礮則於洋面寬闊處用圓木浮水面爲的令其照準施放期於命中失則有罰以圓木之隨波浮沈而又加以船隻之動盪果能礮無虛發則臨敵時自覺目定手穩不稍游移而駕駛之餘再爲訓之以行列令之以進退或可爲制勝之師臣於水師自上次改設登榮兩營派員訓練卽定以入海爲第一教法而槍礮之準則延一外洋人教之駕駛之法則特選募粵中之精於摩水者教之辦理甫有規模臣卽得假回籍

現聞該水師一切操練尙守舊章而熟悉與否擬俟河工竣事後親往校閱力加整頓但該水師初設僅八百人原擬當時海疆無事不敢多設人數以節餼需今若籌辦海防八百人似覺過少臣擬每營再酌添二百名合成千二百名之數照舊章訓練有此始基設遇倉卒生變卽照臣上年原議選募海盜強壯漁人於風汛沙綫皆能熟習編列成隊而配以練成之兵第使專習槍礮申明紀律以之應敵自亦可用至陸兵則軍興十數年來戰守之法人人皆知但儘現有之營勤加練習萬一臨事不敷調用隨時酌募便可應手不必再議添設徒糜重饟其丁日昌所籌陸兵兼習水師似覺未爲盡善臣以爲水師能兼習陸師

陸師斷不能兼習水師蓋陸兵不習洋面一見大海之狂
瀾已覺心搖目炫心目旣亂而平日所習之藝皆非非若
水師慣歷洶湧一經登岸則舍危險而履康莊倍覺游刃
有餘惟水師水操之外亦可兼練刀矛以備登岸策應誠
不可少之事也又閱簡器一條查自古器械不精以卒予
敵兵家先求利器尙矣顧器莫利於火器而火器尤莫利
於外洋所幸者外洋有獨擅之利器而不思自祕其長每
製一械但使足以濟用卽貪利而轉售之他人此在彼有
自敝之愚在我則有可乘之機第中國雖購洋礮而施放
不能如彼之準此由測算礮力礮藥所及之遠近高下不
及其精故彼之利器在彼用之仍可擅長我用之則仍不

可恃臣愚以爲礮宜購備而放礮之準頭尤宜講求查現
在外洋之槍礮以克虜伯近時所造之後膛開花槍礮爲
最精然亦必得其施放之術乃可以命中而致遠臣上年
改設水師艇船卽在彼購辦大小鋼礮銅礮十四尊槍一
百二十桿均極精良初到東時無人悉其施放之法嗣乃
延一西人教之數月演放始能如意臣擬籌措款項分購
口徑七八九十寸大之後膛鋼礮各數尊以備應用惟此
礮價值甚昂東省籌款不易擬分年勻湊十數萬金陸續
購辦第各礮均購自外洋在彼之利器固失而我之財力
終虧惟冀閩滬所設機器局極意經營及時仿造凡在管
理局員及一應工匠人等務就其已成之器殫精畢思悟

澈其實在精妙之處然後工力悉敵器不虛製且積久生
新亦無難奪彼之長如此辦理庶我之財力不致盡耗於
外洋斯爲計之得者也又閱所議造船一條查中國舊式
戰艦誠遠遜輪船之捷利現在閩滬兩廠製造頗具成規
無難力求精進惟造船之費甚鉅養船之費亦多各省斷
難照行一省亦難獨任臣愚以爲以後製造之事專責之
閩滬兩省養船之事分責之沿海各省相維相助閩滬可
以節養船之費挪之於造船各省可以節造船之費挪之
於養船如此挹注則費較省而事可永圖第中國海疆寥
遠現有船隻以之分防自不敷用應由各省酌量籌辦分
年購買卽以東省洋面而論必須有輪船三四隻呼應方

靈現僅有閩局調來一號臣已飭煙臺所練之槍隊挑撥四十名赴船操演以後尙擬購備一二隻添入操練一遇有事乃能應手惟以東省之財力非蓄之三四年不能成功至於舊式艇船原不及輪船然亦不可不相閒互用蓋輪船遇大洋深水迅駛自足見長若遇淺水膠舟或附近島嶼窄隘之處有艇船旁出以擾之游弋無定以牽制之亦可助輪船礮臺之力近閱西人防海新論知其用輪船與鐵甲船亦須參用舢板至其田鷄礮船極爲得力然細觀其戰攻時該船所到之處須用輪船拖帶則此項礮船亦非輪船可知丁日昌所籌有輪船數隻卽可將一切師船廢棄不用殆未思海面雖大而其中島嶼分歧各處亦

多汊港有舢板艇船伏藏其閒正可以出奇制敵似亦不必偏廢至鐵甲船本屬堅固然以臣愚見似祇宜施之於海口緊束之區輪船必由之道如直隸之大沽江蘇之吳淞等處有此一船把塞則可動可靜極爲靈活得力若舍海口而恃之以遠攻該船恐亦失之笨重反不及輪船之便捷旋轉悉能合宜查東省洋面至爲寥闊無緊要收束之海口鐵甲船暫可以不購惟礮臺則斷不可不修臣聞丁日昌所籌極合機宜蓋沿海城池險隘非得礮臺爲特角一經大礮遠轟則萬不能守但此時修築礮臺非僅如尋常守備疊土累石隨便據險爲之遂謂可資捍禦也必須得熟習海疆形勝精通地輿深明算法而又周知外洋

攻戰機宜之人或乘舟歷險或登山涉隘遠測近觀以定
臺基臺基既定然後講求築之之法方圓斜正一一精審
務使彼船之礮不能遽傷我臺我臺之礮可以遽及彼船
斯築一臺始得收一臺之用不致動糜鉅款徒費無益然
臣於礮臺一事上年曾擬興辦以地勢未經勘定未及舉
行竊以爲修築礮臺之法有明礮臺尤須有暗礮臺明之
以顯互相攻擊之具暗之以爲出其不意之舉庶幾奇正
相生使我之礮可以擊彼之船而彼不及防且不知所以
防斯爲得礮臺之利固不僅在照其臺式也臣籌辦東省
海防注意以礮臺捍蔽各城而以輪船爲游擊之師以艇
船舳板爲相間雕擊之用雖不遽能制勝或亦可以應敵

至丁日昌所云演礮不得其準守臺不得其人則爲近時切病然此則在練兵時嚴飭統領加意講求重示賞罰固不難立時改觀也又閱所議籌餉一條查中國餉源所入以錢糧關稅爲大宗軍興以來始行抽釐軍務至十數年而餉糈不致十分告匱者未始非抽釐之力今欲求餉需不竭之源大約仍以此爲較有把握但目前釐金如江蘇廣東湖北江西湖南四川安徽浙江福建等省水陸相通商賈輻湊釐數較旺如能認真講求嚴核官紳之中飽重懲胥役之偷漏力杜不急之開銷而又於正用之中加意撙節事事核實當可有盈無絀是全在各省司事者設法層次句稽如各州縣徵解錢糧正雜之例不容稍涉弊混

斯爲得之若舍此而別求之開煤挖礦非不獲利於一時而地力一竭無業之輩能聚而不能散勢必釀成事端是欲籌餉以禦外侮轉致內患叢生外侮亦無從籌禦此則事之必當計較萬全者也惟釐金之爲餉源東南各省可恃西北各省實有難行然使各省能於賦稅所入勤加考核事事句稽而持之以節用亦未始不可自裕此全在因時審勢善自爲謀固不能以一格繩矣又所議用人持久兩條查自古爲國得人者昌用兵特其一事現在籌辦海防任人最爲喫緊不得其人兵器與船皆成虛器惟海疆之用兵不惟與陸路異卽與長江水師亦異故得人尤爲最難該王大臣所議令各直省大臣實舉所知公議會推

誠爲慎重選擇之計况軍興以來各省用兵日久未必遂無所知然所知多係陸路之兵與長江習戰之員以之移任海防恐知識未能盡悉萬一遷地弗良以陸路長江之將才而失於海疆之一蹶亦爲可惜臣愚以爲人才以磨礪而出但須得質地樸勇血心自負之士任之以事假之以權責之以效而又能正以率之嚴以馭之恩以結之使之知畏知感自能鼓舞奮興可以致其死力足爲我用如謂一舉而卽爲可靠之才恐亦未敢必也至練兵製器造船各事該王大臣議以持久行之而要於一心一力誠爲確論凡事未有不持久而可期有成亦未有一心一力而可望集事者臣自愧庸愚旣不能爲

國家宣揚德威及至事機緊要而猶以泄沓從事自顧何
以爲人惟有於應辦各事自矢忠誠次第興辦以期事豫
則立稍得上紓

宸廑抑臣更有請者自來用兵之道不外戰守兩端然有
戰不如守守不如戰或以守爲戰以戰爲守者此中機宜
尤當審決古來哲人謀國名將用兵未有不於此兢兢者
今日籌辦海防原屬先期圖維預籌戰守之方而尙未有
戰守之事然此日外洋桀驁甚矣我以通商之事相與羈
縻彼亦圖通商之利暫爲安息近聞各該國貿易虧折頗
多輪船在中國者亦漸不得利狡焉思啟自在意中臣愚
以爲防事辦定將來如果有警其要利於持守而不利於

輕戰夫所謂不利於輕戰者非怯敵也誠以與外洋用兵較之與內地用兵機勢迥別其間毫釐千里萬不可忽內地用兵賊皆處我心腹之地此擾彼竄必能戰而後賊可平專言守則到處設防轉致任賊蹂躪益形滋蔓故戰勝於守若與外洋用兵則主客之形勞逸之勢彼不如我且彼遠涉數萬里之重洋而與我爭勝於一旦其輪船所燒之煤所裹之糧所需之軍火皆難持久其船利在速戰若使彼一戰而勝則我之沿海兵民皆以爲我之輪船不如彼之捷槍礮不如彼之利則氣必餒氣餒則勢必散而彼乃乘其散而入我內地或以重利勾結奸民爲之前驅或有漢奸乘機附和分我兵力則不必陸路稍有挫失而海

防固已全隳大局亦不可問且不特此也彼之所以與我
構衅者欲爭我土地耳彼處空虛無物之大洋而爭我財
賦所出之土地若輕與之戰幸而獲勝彼不過傷一二船
於彼固無大損若不幸而敗則彼得乘勝以據我土地於
我所失甚多此閒輕重尤貴權衡故海疆之事能守卽爲
能戰日後有警之時我但慎守沿海礮臺密防沿海城池
險隘而但以輪船與之抵角於近海之閒以爲礮臺城池
險隘之防護又以舢板船艇船與之出沒隱見於島嶼紛
錯之內以爲輪船之聲援彼欲急戰而我故延緩之彼欲
不戰而我故牽制之務使之進不得戰退不得息久之糧
盡煤絕勢必自潰迨其自潰我乃乘其勢而擊截之或尾

追之當可取勝此所謂以守爲戰也至於輪船倚煤爲命
近日各該國每羨中國產煤之區臣細加訪求有云該國
年來用煤過多出煤漸少勢將垂涎中國之煤臣故上年
於山東淄川博山濰縣出煤各屬均已明定條規爲先發
制人之計以防窺伺如將來有事中國之煤與糧務令斷
其接濟亦爲切要兵法云知己知彼臣知識淺陋豈能知
兵惟審機度勢實見海疆兵事誠有戰不如守而守卽爲
戰之機宜決當慎重於未發之先而不可以忽視者可否
請

旨密飭廷臣及沿海各省將軍督撫等酌度臣言之得失
以爲日後用兵之大計不勝禱幸之至所有遵

旨覆議海防應辦事宜各緣由謹恭摺密奏伏乞
皇上聖鑒訓示謹

奏

請飭黑龍江等處精練馬隊片

同治十三年十一月二十日

再本年日本構衅仰賴

聖主福威遠被懼不敢逞誠爲幸事查該國初有通商之議臣曾函致曾國藩以彼偏處東洋距浙不過萬餘里疆梁負固自昔已然今忽請通商拒之似難許則恐非我之利殆不謂其互市未逾二年遽思狡逞然臣年來所私憂竊慮寢食不安者則尤在於俄羅斯而日本其次焉者也蓋外洋各國與中國水路雖通而陸路不通且均遠在數萬里外日本洋面雖近而陸路尙阻惟俄羅斯則水陸皆通中國而水路較之各國爲近陸路則東北西北直與黑龍江新疆等各處連壤形勢在在可慮况該國最稱強大

自通商以後皆與各國一律換約輪船亦時有往來而臣
數年中暗爲查考通商各口並未見該國有大宗貨物出
進交易而每遇各國與我口舌等事彼往往兩利俱存務
爲見好此卽其意存窺伺乘機觀變之大較也臣竊謂各
國之患四肢之病患遠而輕俄人之患心腹之疾患近而
重現在東南海防漸次籌辦而北面爲

京畿重地以東北形勝而論俄則拊我之背後路之防尤
爲緊切臣猶慮將來事勢稍變各國互相勾結日本窺我
之東南俄擾我之西北尤難彼此兼顧應請

旨嚴飭黑龍江吉林奉天及蒙古精練馬隊數萬無事則
藉以控制有事則資爲戰守第此數省中惟黑龍江之人

樸拙而強健極爲可用臣從前委員赴該省調其來東親爲訓練知之甚悉吉林奉天之人則微染風氣不似黑龍江之樸勇必須認真挑選蒙古則從前忠親王僧格林沁多帶來東勦賊臣見其樸實敢戰較甚於吉奉兩省此時如認真操練大約黑龍江可練馬隊一萬五千人吉林可練一萬人奉天可練八千人蒙古可練八千人共計練足實數不准一名虛冒然必

簡派熟練馬隊戰攻之大臣如都興阿等前往挑擇編列成隊明定陣法嚴立規條每月每日每時應行操演之事均著爲程式不准閒斷每歲秋冬則欽派王大臣校閱一次查其年力之強弱技藝之生熟陣

法之整散以判其優劣考其勤惰定爲賞罰必期悉成勁旅爲東北西北兩面之屏蔽庶可有備無患然練兵必先足饟近日東三省月饟多不敷用枵腹之虞亦難責以成效應請

飭下各該省練兵大臣實計每年操練之兵應須專饟若干核實開報奏請

飭部查明各直省何省可撥若干指撥分解不准藉詞短少則饟不致缺乏而兵丁乃得以盡力操練雖今日不無稍費而日後緩急可恃所獲實多此誠東北現在緊要應辦之事亟宜早圖不可或緩

臣知識愚昧私心所慮不敢

不以

上陳謹附片密奏伏乞

聖鑒訓示謹

奏

調張蔭桓文天駿片

同治十三年十一月二十日

再東省現籌海防臣定以修築礮臺與安設製造藥丸及修理槍礮之機器兩事爲先務惟修築礮臺先須查勘沿海道里遠近高低形勢期與各近海城池市鎮險隘互爲掎角而基之方圓斜正高厚寬窄又期內足以自固外足以禦敵且必明暗相閒斯爲適用自必得熟悉地輿算法及深明海疆攻戰情形之人測度創造方期合法至安設機器亦必得諳習之員始能成事而省費臣上年奏調廣東候選員外郎溫子紹已蒙

允准嗣該員辦理廣東機器局有經手事件未能來東而現在防務必不可緩臣再四採擇惟有湖北候補道張蔭

桓識力過人從前在東省隨臣勦賊有年調練黑龍江馬隊管帶追勦及防守黃河均爲得力該道籍隸廣東生長海隅熟悉洋務而於礮臺機器各事在粵時常與西人講求聞見極多足資襄贊又刑部候補郎中文天駿留心時勢遇事講求臣從前奏調來東亦爲海疆儲材起見經部以格於定章駁奏中止查張蔭桓現辦湖廣督臣李瀚章營務現在湖北旣無海防江防亦無可辦文天駿尙在部當差當此東省需人孔急相應籲懇

天恩俯念海疆籌辦要務

飭下部

臣

暨督

臣

李瀚章轉飭文天駿張蔭桓迅速來東

以資差委俾

臣

得收臂指之助實於海防大有裨益謹附

片具奏伏乞

聖鑒訓示謹

奏

荷澤堵口兩壩進占摺

同治十三年十二月十四日

奏爲荷澤堵口大工現辦情形並兩壩分別進占日期恭摺馳陳仰祈

聖鑒事竊臣前將勘明石莊戶決口應在迤下之荷澤賈莊地方施工當將建壩築隄情形繪圖貼說詳細具奏在案嗣於十一月二十一日欽奉寄

諭石莊戶工程關係數省地方自當不分畛域通力合作趕籌辦理卽著丁寶楨籌備料物督催在事各員及早興工以冀剋期蒞事等因欽此臣前於拜摺後卽將應辦事宜督飭各員上緊趕辦並以兩壩地勢過低誠恐積凌水至或至上灘必須臨河先疊小堰以資攔護正在集夫漏

夜趨築尙未一律接連乃二十三至二十八等日天氣驟寒河面冰凌擁積水勢立見串灘相立壩基之處南北均有水一二尺當於水內鋪料壓土逐層搶廂一氣直抵壩基始免水勢續漫其北去分溜同時漫灘前摺所陳支流三道自數十丈至百餘丈者數日之間水面遽寬至數百丈及千餘丈水深一二尺至四五尺不等且舊河下游凍合十餘里致凌水益擠入灘地若爲日稍久必將刷出溝槽逼成溜勢於工程大有妨礙臣查看之餘深爲焦慮幸本月初九十日天氣稍和前所凍合之處微開小溜漫出坡水始見略消擬俟灘面涸露漸多刻卽多集人夫將各支流普漫通連之地先行搶疊小堰一道剋日告成旣固

隄基兼通料路俾免他虞現在東土難以行礮俟立春後
土脈漸融卽就小堰幫築成隄以防汎漲現計正雜各料
已催集十之二三動工可期接續南壩灘面尤低已將壩
基曉夜趕築刻已完竣卽定於十六日先行進占北壩地
勢略高進占卽係深水比南岸可緩一步壩基現亦將竣
擬俟二十外再行進占綜計兩壩占數較多非七十日不
克蒞事現距清明節氣亦祇兩月有餘臣惟有朝夕督催
嚴飭在工大小各員事事提前趕辦務於清明前合龍不
敢稍涉遲緩以仰副

聖主軫念河防之至意所有荷工堵口現辦情形並兩壩
進占日期謹恭摺附驛四百里馳陳伏乞

皇太后

皇上聖鑒訓示謹

奏

恭慰

聖慈

大孝摺

月治十三年十二月十九日

奏爲恭慰

聖慈

大孝瀝誠泣懇

垂鑒事竊

臣

於同治十三年十二月十六日在曹州府賈

莊工次接准禮部咨同治十三年十二月初六日內閣鈔

出初五日奉

上諭本月初五日酉刻

大行皇帝龍馭上賓

臣

伏地哀號罔知所措又於是日復

准禮部咨奉

上諭咸豐十一年

文宗顯皇帝大事

大行皇帝曾遵成例停止各省將軍督撫提鎮藩臬及鹽關織造等來京叩謁

梓宮今

大行皇帝升遐其各直省將軍督撫都統副都統提鎮城守尉並盛京侍郎奉天府尹及西北兩路將軍大臣並學政鹽政織造關差等均不必奏請來京叩謁

梓宮致曠職守各該員等惟當竭誠盡職以期無負委任不在儀節虛文也將此通諭知之欽此痛惟

大行皇帝臨御寰宇十有三年上秉

慈謨親賢並任戡四海積年之寇飭普天望治之心

聖德中興萬方欽仰迺艱難之初濟遽遇密以銜哀臣疆

寄忝膺河干於役未及宣防奏績慰

玉兒末命之懽泣血痛心攀號何逮亟思叩謁

梓宮一展哀忱乃欽奉

諭旨停止瞻望

闕廷神魂震愴理合恭摺專差呈進敬慰

皇太后聖慈

皇上下大孝伏懇

皇太后俯念天下之大珍重保護

皇上順變節哀上慰

列祖

列宗在天之靈近法

大行皇帝沖齡繼序七鬯無驚以答中外臣民之望臣無任哀戀懇切祈禱之至伏乞

皇太后

皇上聖鑒謹

奏

勘估運河籌款修理摺

同治十三年十二月十九日

奏爲勘估北路運河淤淺情形預行籌款挑挖以備來年漕運恭摺具奏仰祈

聖鑒事竊查江北漕糧近數年來均由運河行駛來年仍須照辦惟北路運河自黃水穿運以後水過沙停通塞不常且黃流變遷靡定本年修理之道來歲卽不能行必須預爲勘明道路相機審定待至漕船到時正值黃流汛漲人事天時兩相湊合方免貽誤查春閒漕艘經行之路係於王家垓至東平十里鋪修築禦黃長隄一道又將戴廟閘一帶舊河挑挖深通漕船由下十里鋪黃流支河東面繞史家橋逆挽至八里廟口門停泊待汛始得向北暢行

詎料今秋汎水漲發黃河大溜由石莊戶全趨東南以致沙趙二河之水不絕如綫現在辦理運道較之春閒情形迥別亟應設法妥辦以利漕行臣於賈莊工次飭委東昌府知府程繩武會同委員詳細查勘據稟明年漕船經行河道計惟有先將東平之姜家莊沈家口黃水淤墊之處預爲挑通以待經臨再爲相機行走其安山以北至臨清一帶長河歷經黃水灌入淤淺工段亦多必須逐一先行挑挖深通庶漕船入運後無虞淺阻臣復查該府等勘估各工均係實在情形自應照辦當經飭司籌發銀四萬二百餘兩交該府督同委員及東平壽張東阿陽穀聊城堂邑博平清平臨清九州縣剋期挑濬俾漕船到時得以迅

速北上早達京倉不致延誤所有查勘挑挖北路運河現飭籌發銀兩預爲辦理各緣由謹恭摺具奏伏乞

皇太后

皇上聖鑒訓示再濟甯以南河道歷年均係運河道估勘辦理合併陳明謹

奏

河工現辦情形趕築南岸大隄摺

光緒元年正月二十日

奏爲壩口進占後現辦情形並先趕築南岸大隄預爲防範恭摺具陳仰祈

聖鑒事竊

臣

前將荷澤賈莊堵口大工擇日進占並凌水

漫灘設法趕辦緣由具奏在案伏查南壩進占以後因料物應手約計兩日可成一占北壩本擬遲數日亦卽進占祇以料路東隔漫水北阻舊河運解萬難迅速且進占卽係深水誠恐不能接濟轉致停待祇可稍遲數日俟料物漸充再行趨辦因改至正月初一日始行進占其初兩壩埽水深自八九尺至一丈二三尺數占以後漸深至一丈八九尺並有驟淘至二丈以外者現在南北已共進二十

四占臣當飭在壩文武各員趕緊加廂認真盤壓總期穩
慎前進不敢稍涉大意其夾土壩及後戢土工亦卽跟接
前進以期正邊各壩步步著實現在緝量口門尙寬一百
十餘丈兩壩仍須各進十一二占以五日兩占及水勢加
深時三日一占計之約二月中旬前後可期合龍距清明
節尙有十日似不爲晚其藉作引河之分溜先經派員帶
領長把鋤夫於近西灘面多抽溝槽俾得引溜刷滌惟以
凌汛較早漫灘後一片堅冰敲東撈土倍費工力立春後
偶值風暄冰解之際察看引河流勢比前似覺稍暢第黃
水變遷無常自進占以後水勢順暢忽於十五日夜大溜
轉向南滾奔騰湍激徑衝南壩之隄腦壩前面墊陷數丈

水勢直向裏面搜根衝刷沿河灘岸傾陷異常臣趕卽親
往看視一二時閒灘岸隨溜潰塌長至百餘丈寬至二三
十丈不等於正邊壩頗形喫重當經連夜督飭搶廂並飭
調營勇協助三晝夜並未停手至十九日始將隄腦壩及
灘岸搶護幸保無虞查黃水已全向南趨此次辦理堵口
必遏之使北其勢本逆而難以後水勢是否變更尙未可
知惟有竭力搶辦至兩岸應築長隄經臣酌定章程先飭
各州縣將派撥民夫事宜豫爲籌議嗣委員查明道里丈
尺卽分派段落勒限於正月初興工其上游直隸境內隄
工臣曾奏明酌撥津貼一體趕辦惟據大名道府面稟本
地籌費維艱開東民力亦極凋敝意欲全賴東省津貼兼

以北隄跨壓各道支河大汎時倍形喫重防守恐無把握
臣查南岸東明之隄近在大壩上游實爲不得不辦之工
至北岸開州隄工尙於壩工無礙但上游之隄不立則下
游濮范隄工亦無從接辦惟東省旣自辦本境復兼顧直
境實爲力所不逮前蒙

天恩飭部准撥銀一百五十萬兩現僅河南解到銀二萬
兩其餘尙屬寥寥目前悉就本省騰挪濟急核計壩工隄
工兩項需款甚鉅臣通盤籌畫實屬支絀萬分第全局攸
關未敢以東民直民稍形歧視現因直省東明隄工地勢
較低急須趕辦已自任由東省竭力代謀照東民一律津
貼以免因循致誤並飭該縣趕將南岸隄工與東境同時

深每占俱屢次墊廂所用加多又值陰雨阻滯道路以致
稍稽且稽料尙可附近搜求至鑿劬一項必須購自豫境
非剋期所能趕到刻計合龍之期不得不稍緩時日臣惟
督飭文武員弁竭力趕辦不容稍涉鬆勁至各州縣承修
隄工雖於正月中先後興工先因凍土難以行礮嗣值陰
雨土塘積水取土較難勢不能不略有停待現雖一律興
築尙未十分高厚亦經臣飭分段監工委員上緊督催漏
夜趕辦以資防範所有壩工金門收窄水勢日深情形喫
重緣由謹恭摺由驛四百里馳陳伏乞

皇太后

皇上聖鑒訓示謹

奏

荷澤賈莊大工合龍摺

光緒元年三月初十日

奏爲荷澤大工現已堵築合龍追壓穩固恭摺馳陳仰慰
聖懷事竊_臣前於二月十九日將壩工金門收窄水勢日
深情形喫重並催料物趕辦緣由具奏在案_臣於拜摺後
復經分投催提料物一面飭令在壩文武將做成之占加
意盤壓以期堅實二十二十一等日復值陰雨二十二三
兩日大河又長水三尺餘寸金門溜勢益形澎湃二十四
日水勢略平前催續運稽繇各項先後漸集而河南撫_臣
錢鼎銘聞工次料物短絀力顧大局復由豫派船裝運稽
料二百垛連檣而至極爲迅速_臣約計可資應手且節近
清明誠恐水脈漸旺必須上緊趲辦不容稍涉遲回當卽

嚴飭文武員弁自二十五日起兩壩不分晝夜一體搶辦
每進一占金門愈窄溜勢愈猛壩前漸淘至六丈三四尺
復飭將前占盤做十分堅穩再進新占至三月初五日兩
壩門占均已穩固當於初六日卯時挂纜合龍幸天氣晴
明人情鼓舞料土雲集廂壓順手金門占入水漸深察看
波濤雖屬激湍而大溜似已直趨舊河頗形暢順卽於兩
日夜之間壩占已追壓到底並將邊壩上緊趕成亦於初
八日巳刻合龍至初九日酉刻一併閉氣現在壩西水勢
已擡高四五尺當將來土壩趕緊填平加高以擊邊壩惟
後戢前因水勢太深回溜過大土澆不住現在急難接連
已飭漏夜趕澆早完一日俾正壩無單薄之慮伏查此處

決口全溜南趨寬至二百七十餘丈堵築全在灘面施工
略無隄身及高埠稍可憑藉又土性純沙搜淘極易就工
程形勢而論辦理誠無把握臣於上年十一月履勘時卽
深知不易著手祇以舍此扼要之處則溜勢紛歧更無可
辦且此股漫水所注東省江南之災區運道湖河之關鍵
所關於大局者甚鉅不堵則

國家財賦之區與轉漕之路棄於一旦其害胡可勝言是
以不恤躬蹈艱危竭盡人力以爲補救當二月閒水勢驟
長金門淘深之際情形實岌岌可危雖久辦工程者莫不
目動神駭臣惟督飭文武隨事盡力置利害於度外計自

二月二十六日至三月初九日竭十三晝夜之力併力搶

辦壩工竟得合龍水勢仍歸舊河下注張秋東南大局幸
克保全此皆仰賴

聖主洪福

神祇效靈始克臻此臣慶幸之餘倍增悚惕所有在壩辦
工之文武員弁勞苦已四閱月艱險備嘗實屬異常出力
擬請從優獎敘以示鼓勵其餘出力人員應再分別勞績
等次續行奏請給獎至武弁千總以下另行咨部辦理臣
現將善後工程並防汛事宜之應辦豫籌者布置就緒卽
沿途查勘新築隄工順道回省清理署中公事至合龍後
水歸舊河所有各州縣承辦隄工均已足資防範仍飭催
趕緊修築高厚如式以防大汛至動用工需銀兩各省解

到尙屬無多其中有壩工支發各項工料之用有隄工發給民夫津貼之用容臣詳細分別核明數目另行奏報所有堵築荷澤大工現已合龍緣由謹會同直隸督臣李鴻章署兩江督臣劉坤一河南撫臣錢鼎銘恭摺由驛五百里馳陳仰紓

宸廑伏乞

皇太后

皇上聖鑒訓示謹

奏

壩工隄工截明用數摺

光緒元年四月十四日

奏爲壩工善後事宜刻已完竣並現辦隄工情形核計用過工需分別截數恭摺具陳仰祈

聖鑒事竊

臣

前於三月初十日將荷澤賈莊大工堵築合

龍情形恭摺馳奏並聲明動用工需內有堵口工料築隄津貼兩項俟分別核明續行奏報在案伏查大壩合龍以後雖卽搶填土櫃趕澆後戩高出水面以期閉氣惟土櫃後戩正當邊壩與正壩大溜跌塘之處水深至六七丈不等用土甚費急難見功且壩臺仍須陸續加廂土櫃後戩卽須隨之增長

臣

當經選派文武各員妥速辦理以免稽延茲據稟報所有加廂壓土及一切善後事宜於四月初

六日一律告竣並據河工收支局委員核明壩工各項共
用銀九十八萬七千九百五十四兩六錢九分八釐較
上年馳抵工次確勘復估核減需銀一百二十萬兩之數
計仍節省銀二十餘萬兩委係涓滴歸公並無絲毫浮冒
至應築隄工前議南北兩岸約共五百餘里續經復估核
減約需銀一百五六十萬兩嗣以壩工係在南岸且北岸
地勢較高應先將南岸丈量明確俾上下游同時施工計
東省荷澤等縣共一百九十里餘直隸東明計四十三里
餘又東明續增李連莊迤上隄工十八里餘綜計直東兩
境南隄共二百五十餘里東境地勢較低原定隄身底寬
十丈頂寬三丈高一丈四尺均飭各州縣勸諭民間認段

協修定以每里發給民夫津貼銀二千四百兩其中有坑塘溝槽並低窪積水處所應須格外填墊加用椿料之處隨時查看寬深丈尺另行酌加津貼直境地居上游灘面稍高隄身定爲底寬八丈頂寬二丈高一丈二尺每丈土方計酌減三分之一津貼亦核除三分之一亦飭該縣勸諭民間協力興修每里計發津貼銀一千六百兩李連莊以上十八里地勢尤高隄身丈尺亦稍減共計津貼銀一萬兩因直隸未能籌款所有東明隄工津貼銀兩經臣卽在東省工需項下一體全數協撥發交該縣以期趕辦現計直東兩境南岸隄工津貼共用銀五十餘萬兩因按段分工之處彼此各有畸零又平地築隄所有跨壓河身及

填墊溝槽積水各處甚多民力實有不逮應酌給津貼多寡不等現在尙難核定應俟驗收覆丈時再行定數截明用款辦理茲查南隄工程已成者十之三四至四月中旬可成十之六七四月底卽可一律告成於防禦伏汛不致遲誤惟下游跨壓支流前擬在菜園莊施工旋以引河日旺該處水勢漸深不易著手因改在盧莊跨壓沮河使黃水仍由十里鋪多一去路庶下流較暢惟跨壓沮河丈尺寬至八九十丈需用料物填築爲費較多亦經酌給津貼交地方官督飭妥辦至北岸隄工本應一併舉辦祇以前此水勢漫灘擬立北隄基址尙多有水嗣約計時日已迫誠恐趕辦不及臣於正月中旬奏報壩工情形曾聲明若

北隄不及辦理應先暫修金隄以爲屏蔽茲已派員勘估
仍令附近州縣勸諭民夫協修應給津貼共需銀三萬餘
兩亦已卽日興辦其另築新隄一節俟本年秋汎後察看
情形再行酌核抑臣更有請者此項大工原爲保護東南
災區及運道大局之計故堵決口則必須築長隄旣築長
隄則不能不資防守而新工大隄長至二百五十餘里又
加以防護金隄一百數十里合計兩岸長隄至四百餘里
皆無專管之官轉盼大汎卽臨豈暇從容籌議臣祇好將
留防各營勇分布巡防並以地段過長復飭各州縣督率
附近民夫一遇險工竭力隨同搶護以爲一時權宜之計
惟防汛必須料物而各省指撥工需銀兩至今報解尙未

及半所有隄壩兩工用款均係遵照前奏陸續由司道各庫挪湊接濟此後所需防汛經費仍應飭司寬爲籌撥應用期免貽誤俟各省協款解到再行歸還至將來此項工程之如何修防似應設立應汛改歸經制方期持久應請敕下部臣河臣通盤核議奏明辦理實於河務地方均有裨益所有壩工隄工現辦情形並截明用數緣由謹繕摺由驛四百里馳奏伏乞

皇太后

皇上聖鑒訓示施行謹

奏

大工用費節省請免造冊報銷片

光緒元年四月十四日

再興舉大工籌辦已極艱難造銷尤爲繁重此次買莊堵口工程臣自開辦以至合龍親駐工次未嘗暫離凡料物之購運工費之收支各有專司每日具報事無鉅細臣必隨時自行考核不敢稍疏實係涓滴歸公毫無虛耗之弊就堵築二百數十丈之口門工需不及百萬兩用費本極節省然以辦公之情事而論如此辦法斷非河工諸臣之所能故臣初次估報工需時前河臣喬松年兩次函商以隄壩兩工原估約需銀四百七十萬兩爲數不敷將來恐致掣肘應再切實核計奏增撥款方期應手以喬松年歷年辦工極稱核實此次未敢輕言節省者實以工程浩大

一切用費斷非節省所能了事然臣所可自信者亦祇期事事核實使在工大小各員不萌欺飾之念務濟要工至於如何造銷東省向無成案又實非臣及在事各員之所能伏查同治十一年堵築侯林大工共用工需銀三十二萬八千餘兩於事竣後奏奉

諭旨以東省向無河工將用款開列清單奏咨立案免其造冊報銷此次所用工需除隄工項下多係藉資民力按里發給津貼原屬官民協辦礙難分別工需應照數開除另行辦理外所有壩工動用銀九十八萬七千九百五十四兩六錢九分八釐擬請援照前案仰懇

天恩仍准逐款開列簡明總數清單奏咨立案免其造冊

報銷誠知此次用數比侯工幾及兩倍何敢援案竄請實緣東省本無河工於造銷諸未諳悉與前次情形相同且此次丈尺比侯工加多兩倍其工作時日侯工自進占至合龍計二十四日此次自進占至合龍計八十餘日歷時不止兩倍而核計用款比侯工仍覺節省其毫無浮冒亦可概見是以據實瀝陳非爲請免造銷有所趨避如蒙

俞允感荷

鴻慈實無旣極理合附片具陳伏乞

聖鑒訓示施行謹

奏

大工用款開單具陳摺

光緒元年六月初十日

奏爲荷澤賈莊大工核明收支各款遵

旨開列清單恭摺具陳仰祈

聖鑒事竊臣前將籌辦大工截清用數具奏並聲明工費
節省請免造報欽奉

諭旨著開單具奏免其造冊報銷該部知道欽此仰見

聖主於慎重經費之中寓體恤臣僚之意下懷欽感莫可

名言當卽轉飭經理收支局員遵照趕辦茲據該局員將

用款核明開列收支簡明清單呈請具奏前來臣覆加確

核均屬相符伏查此次堵口築隄工程情形既鉅道理較

長臣初次約估需銀四百七八十萬兩嗣於抵工查勘後

力求樽節復加核減計壩工約需銀一百二十萬兩隄工約需銀一百五十萬兩共先請撥銀一百五十萬兩不敷之數再行續請嗣經戶部撥銀七十萬兩仰蒙

特恩准照原請飭部指撥及上年籌堵石莊戶工需改解

漕臣衙門未用銀二十餘萬兩並准提用臣深知經費維

艱兼以各省撥款解到需時不得不在本省就近設法以應急需當卽在於藩運糧道各庫通融湊撥俾得及時趕辦無誤機宜嗣各省撥款亦經陸續解到藉資接濟計自開工截至現在止惟兩淮江蘇江西湖南安徽五省原續指撥之款全數解清其浙江湖北河南四川福建廣東等省或僅解到數萬或尙未據批解合之本省奏撥之款總

計收銀百餘萬兩僅得十分之六現將先到之款統歸壩
工作收壩工餘款撥歸隄工作工至隄工用款係按里津
貼民夫尤爲刻不可緩已由東省各庫籌款墊發以免遲
誤俟各省續行解到隨時撥還歸款統計壩工共用銀九
十八萬餘兩比核減之數仍節省銀二十餘萬兩隄工共
用八十一萬餘兩雖所築僅南隄北岸金隄係屬修補而
各項水內工程均不在原估之內較之核減之數亦屬有
減無增所發隄工津貼中有民力其各項棘手工程爲民
夫所不能施工者不得不另爲籌辦因係與隄基相涉故
附入隄工開列所有用項應於壩工款內登除另摺詳陳
謹將壩工收支各款逐一查核開具清單仰懇

天恩敕部立案施行謹恭摺具奏伏乞

皇太后

皇上聖鑒訓示謹

奏

謹將荷澤賈莊大工合龍收支各款開具清單恭呈

御覽

計開

收款項下

一陸續收藩庫銀二十萬兩

一收江西上年原撥協饒解存漕運總督衙門銀三萬六千兩

一收江西兩次解到銀十六萬兩

一收兩淮解到銀十六萬兩

一收江蘇上年原撥協饒兩次解存漕運總督衙門銀六萬一千兩

一收江蘇三次解到銀十萬兩

一收河南解到銀二萬四千兩

一收浙江兩次解到銀六萬兩

一收安徽兩次解到銀六萬兩

一收湖南兩次解到銀十萬兩

一收湖北解到銀三萬兩

一收四川解到銀二萬兩

以上共收銀一百一萬一千兩

支款項下

一支採辦秣稭銀三十二萬七千五百六十四兩

一支採辦蘇蘇銀二十三萬四千七百十七兩七錢五分

一支採辦榆楊木椿概銀二萬六百三十六兩七錢

一支採辦椿木腳價銀一萬一千七百九十二兩四錢

一支南北壩基土方價銀五千三百三十一兩五錢五分

四釐

一支正壩土方價銀七萬八千一百三十兩六錢五分六

釐

一支邊壩土方價銀六萬四千四百八十九兩八錢二分

四釐

一支夾土壩土方價銀十一萬一千四百三十七兩二錢

八釐

一支正壩後戩土方價銀八萬一千九百八十兩八錢五

分六釐

一支各項夫役工銀三萬四千六百八十兩

一支鑾委兵口分銀一千九百二十兩

一支纓纜各價銀一萬五千二百七十三兩七錢五分

以上共用銀九十八萬七千九百五十四兩六錢九分八釐

除用實存銀二萬三千四十五兩三錢二釐歸入隄工案內支銷登明

隄工用款請 簡員查勘摺

光緒元年六月初十日

奏爲荷澤賁莊大工修築南岸長隄暨補修北岸金隄一律完竣臣親歷驗收高厚如式核明用過津貼銀數並挑挖引河各項工程一併核明用款恭摺具陳仰祈

聖鑒事竊查荷澤大工所有南岸上下游建築長隄酌定隄身面寬丈尺按里派撥民夫發給津貼並北岸隄工以時日過迫不及趕辦先將金隄修補其工程亦照南岸藉助民力酌給津貼冀省經費各情形均經節次具奏在案伏查南岸隄工上自直東交界起下至十里鋪運河入黃之處止東省計長一百八十里非分派各州縣多集人夫萬難及時並辦經臣酌派荷澤定陶城武濮州鄆城鉅

野嘉祥濟甯汶上東平十州縣分段承修計每日需用人夫共十餘萬之多復經選派大小委員認真監催以免工程偷減遲延之弊該州縣或係被水災區情切免害或係接壤鄰封力顧大局類皆裹糧荷鍤遠道赴功大工興舉之地物價昂貴民夫於所領津貼外多有不敷每里必須自行籌費多寡不等又定陶城武工段之間計三千數百丈通處大河上年十一月下旬凌水上灘之後十餘里一片積水民夫無從著手復經雇募長把鋤夫並調撥標兵營勇從遠處運土全在水內施工先成寬四丈高六尺之小堰一道以禦壩口收窄擡高之水然後由外幫築大隄其近水極險之處並添築月堰以爲外護大隄丈尺土方

黑龍江練兵事宜摺

光緒元年八月初二日

奏爲密陳管見恭摺仰祈

聖鑒事竊

臣

准軍機大臣密寄光緒元年六月二十七日

奉

上諭黑龍江營伍空虛亟宜簡練軍旅以壯聲勢著豐紳托克湍於在伍兵丁實練六千名西丹兵丁添練四千名分旗調考各屯騎射槍箭豐紳等務當督率各官兵實力操防不得稍涉鬆懈至招集流民最難駕馭能否募練五千名備我驅策不致滋生事端並著豐紳等體察情形奏明辦理黑龍江練兵工食馬乾每年應撥銀八萬四千兩著丁寶楨劉齊銜各於該省地丁項下每年各撥銀四萬

二千兩解交黑龍江應用等因欽此仰見

朝廷垂意根本計畫精詳莫名欽佩

臣

惟東三省關係至

重黑龍江吉林毗連俄境牖戶之計亟應未雨綢繆查黑龍江風氣本厚近雖驍勁稍遜於往時而樸質仍冠於各省此次簡練該軍在該將軍等必能懷遵

聖謨除去一切無益具文核實訓練以期臨事得用惟招

募流民一事

臣

愚則以爲決不可行何也凡兵之可用者

以其心地誠樸不計利害不知趨避樂爲我用耳若外來流民素無職業游蕩爲生無食則妄生事端得食則習於淫佚詐僞多方即使申之以號令亦不過陽奉陰違貪我廩餼何有實心甚且以其游猾之習暗教同營弊尤不可

勝道現在黑龍江之兵其所以異人者在風氣之樸訥其
可期得力者在性情之椎魯若就其質實之風嚴加操練
優給饟糧不雜以外路氣習日久自能改觀儻於此時招
募流民是以訓練未定之軍心雜以黠狡最甚之奸民誠
有如

聖諭所謂最難駕馭者非特不能得力適足以壞該省純
厚之俗而貽後日無窮之慮或謂各直省用兵亦多有招
募外人者何獨於黑龍江不宜不知各直省招募外路要
各以其類相附並不敢於人地素不相識之處輒議開招
卽從前勦賊時日有戰事各將領以兵勇或不敷用往往
就地招合亡命藉以成軍而當時之約束匪易事後之遣

散更難似應卽行停止毋庸議招以爲正本清源之計斯爲妥善至該省練兵數目伏讀

諭旨飭令於在伍兵丁實練六千名西丹兵丁添練四千名分旗調考騎射槍箭臣愚以爲兵至萬人已不爲少但營伍與操練之法似宜酌量將舊時程式稍爲變通大約一營之隊伍必使之前後中左右可以彼此聯貫互相分合照應陣式必使之練目前可以制敵之法應變之方不可徒事外觀其器用一層則宜以多練馬上槍礮並兼習長矛爲要蓋馬戰兼練步戰斯不易爲敵所窘凡此數端皆屬切要然尤須將領得人能使一營之中自營官以至兵丁真意貫注習久自成精騎雖今日所練萬人而異日

推演擴充恢之彌廣自足以還樸勁之舊觀而示鄰敵以
形勢應請

聖明慎簡將領責以成效不拘舊時之文法專課新練之
實濟精神所注自克日起有功矣臣愚無識竊以關係
國家本計管見所及不敢不切實上陳以備

廷謨採擇至應解協撥黑龍江練兵工食馬乾各銀兩臣
以該省練兵緊要先已飭司分起籌解銀三萬四千兩下
餘無多務期於九十月內掃數解清以維大局決不敢稍
涉因循上煩

宸廑合併陳明謹繕摺密陳伏乞

皇太后

皇上聖鑒訓示謹

奏

密陳各國兵船來煙片

光緒元年八月初二日

再東省煙臺地方爲中外通商口岸每年各該國均有兵船或二三隻不等來煙避暑秋涼卽行南去歷經妥爲鎮壓不致生事茲臣接據登萊青道龔易圖稟報今年入夏來煙兵船無多乃自七月二十日至二十七日忽有英法美布各國兵船共八隻來泊煙口並聞英國水師提督兵船隨卽到煙帶有公文赴津又聞尙有兵船數隻亦卽可以來煙等語並查開兵船數目呈送前來臣查通商各國近日尙屬相安何以忽有多隻兵船來煙停泊雖現在各該國來意如何並未顯露尙弗得知而臣細揣其故必係爲滇事未結藉此爲要挾之具當卽密飭龔易圖不動聲

色仍照常派員鎮壓居民不令再滋他事一面暗爲查探
該國是何舉動如有意外之事一得的耗卽行飛稟核辦
並密飭駐紮煙臺洋槍隊一營及登萊水師兩營日勤操
練預爲防備又密飭署登州鎮總兵王正起前帶赴登之
陸隊二營一併密爲預備以資防範以後情形如何臣當
隨時相機籌辦陳奏所有各該國兵船來煙停泊及臣現
在密飭稽查鎮壓並預爲防範各緣由謹附片密陳伏乞
聖鑒謹

奏

保舉薛福成黎庶昌暨徐建寅創辦機器片

光緒元

年八月初二日

再臣維中外現在交涉事件迭起環生儲才不預無以應變第風氣以獎掖而自開人才以磨鍊而後出博求通識之士砥礪講求遇事器使異日必有爲

國家任事之人本年四月間王大臣議准出使一節荷蒙諭旨飭各督撫各舉所知以備任使最爲今日切要之圖臣查知府銜直隸候補同知直隸州知州薛福成學堪致用識略閎深江蘇候補直隸州知州黎庶昌志節堅毅抱負甚偉以上二員均擬請

飭下總理衙門存記遇事酌量奏請

簡用同知銜候選知縣徐建寅志正才明洞精西學業經總理衙門奏保在案臣先於四月間亦經咨調該員前來商辦機器製造各事現擬俟其到東卽須委辦從前欽奉諭旨有令直隸督臣李鴻章揀派明幹委員會同東省委員登州鎮總兵陳擇輔赴粵洋購辦機器雇工一切事宜昨准李鴻章函稱亦卽派委該員前來會同辦理合併聲明爲此附片具陳伏乞

聖鑒謹

奏